



La finamira da la Fonoteca è da por-scher en mintga chantun almain in post per tadlar. MAD

# La Fonoteca Naziunala Svizra facilitescha l'access a ses archiv

## Cura vegn installà l'emprim post d'access virtual a l'archiv sonor en Grischun?

■ (cp) **La Fonoteca Naziunala Svizra, situada a Lugano, è l'archiv sonor da la confederaziun. Ella s'occupa da la preservaziun dal patrimoni sonor da noss pajais e sa participescha uschia a la conservaziun da nossa identitad culturala.** En ses archiv sa chattan documents auditivs da tut gener: musica, chant, teater, emissions da radio, giesus radiofonics, cudeschs auditivs. La collecziun entschai-va tar las pli veglias registraziuns ch'i dat insumma e vegn actualisada mintga di. Las registraziuns che la Fonoteca collecziunescha èn vegnidas fatgas en Svizra, realisadas da personas svizras u han ina relaziun tematica cun la Svizra. La Fonoteca è tranter auter en possess da material sonor fitg interessant e per part fitg vegl da derivanza grischuna e rumantscha.

Per facilitar l'access a ses documents sonors ha la Fonoteca sviluppà cun ses

posts per tadlar ina soluziun ideala: Grazia ad ina rait dad intranet e grazia a la digitalisaziun d'ina buna part dals documents sonors da ses archiv èsi stà pussaivel d'installar tar diversas instituziuns da la Svizra posts per tadlar. Quests posts per tadlar permettan l'access virtual a tut l'archiv digital da la Fonoteca. Ils documents conservads a Lugano pon ins ussa consultar per exempel en la Biblioteca naziunala a Berna, en la Biblioteca centrala a Turitg u en la Biblioteca da l'Universitad da Losanna. Il trentavel post per tadlar da la Fonoteca è vegnì avert l'emna passada a la Bibliothèque Musicale de la Ville de Genève.

La finamira da la Fonoteca è da por-scher en mintga chantun almain in post per tadlar. Per quest scopo encurascha la Fonoteca las instituziuns principalas dals chantuns (bibliotecas chantunalas, con-

servatoris, etc.) che n'han anc nagin access a ses archiv da contactar ses spezialists per l'installaziun da post per tadlar. Sco che la Fonoteca infurmescha datti en il chantun Grischun tractativas per l'installaziun da posts per tadlar en la Biblioteca Chantunala a Cuir ed en la Chasa Planta a Samedan. Ulteriurs posts per tadlar pudessan vegnir installads a Scuol, Mustér e Tavau.

Offrind quest access a distanza, po la Fonoteca per l'ina s'avischinar a ses utilisaders e per l'auter schlargiar il ravugl dals clients: En il rom da la politica da valorisaziun dals archiv sveglia questa soluziun in grond interess, perfin a level europeic èn las dumondas per infurmaziuns ch'ans cuntanschan en quest resguard fitg numerusas. Sperain ch'i dettia bainbaud era en Grischun in access a quest archiv fascinante e da gronda valor culturala.